

Cu presentacion di su coleccion di poesia

Belen Kock-Marchena satisfecho



ORANJESTAD (AAN) -- Den entrevista cu DIARIO e escritor local Belen Kock-Marchena a expresa su satisfaccion pa e bunita anochi di presentacion y bautismo di su coleccion di poesia "Milager", cual buki a worde dedica na Zuster Juliette. E kier a acentua riba e participacion di artistanan renombra den nos comunidad cu kier a uni pa trece un bunita presentacion na e invitadonan.

"Ora cu mi a pensa di presenta y batiza e obra mi kier a hacie na un manera unico. Pesey mi a pensa pa acerca diferente artistanan renombra di nos comunidad pa yuda mi presenta mi obra. Pa mi ta masha importante pa mira con diferente expresion artistico por uni den armonia y crea un ambiente di inspiracion".

E anochi a cuminsa cu e voz angelical di nos conocido soprano y solista Tica Giel, cu a canta nos Himno Nacional di Aruba.

Despues di esey Digna Lacle, cu ta un gran amiga di Belen y cu el a scoge pa ta madrina di su obra, a declama dos poema propio. Digna Lacle ta un persona cu ta stima Papiamentu y aña pasa el a haya reconocimiento pa su esfuerso pa nos idioma mama, di GP3.

"Seguidamente, Padu Lampeken a compone un melodia riba un di mi poesianan yama "Vibrashon" a estrene e anochi ey y hunto cu Tica Giel nan a cante den duo na un manera maravijoso.

Loke tabata un momento hopi emocionante pa mi tabata e bautismo di mi obra. Mi nieta

Laurita y mi sobrinita Jeniree a stroesto flornan bibo di Aruba riba mi obra mientras Tica Giel a canta vocalmente e melodia di "Esta, un Milagro".

Prome cu esey e dos muchanan chiquito tambe a canta asina bunita cu nan a conquista e curazon di tur presente".

Mientras tanto e madrina Digna, e padrino Romeo, e yaya Ria y Belen mes tabata hopi emociona pa e momentonan asina precioso aki.

Cu hopi amor Belen a dedica su obra na Zuster Juliette pa su estimulo y apoyo grandi. Na su turno Zuster Juliette, hopi emociona, a hiba palabra pa gradici Belen cu el a dedica e obra na dje.

E anochi aki tambe Lydia Emerencia a compone un melodia riba un di e poemanan di e coleccion "Milager". Lydia, na un manera magnifico a canta e cancion y e gran saxofonista di Aruba Delbert Bernabella a acompaña tambe na un forma majestuoso.

"Anuesca Baly a declama na un manera hopi fuerte dos di e poemanan na Ingles. Loke tambe a haci hopi impacto ta e baile di e poesia "Curashi" cu a worde balia na un forma fantastico door di Genevieve Garcia, Lydia Emerencia y Anuesca, bao coreografia di Wilma Kuiperi".

Tino Ruiz riba su keyboard a acompaña Belen riba diferente di su poesianan na un manera hopi impactante.

Tambe e Maestro di Ceremonia, Ruben Garcia, a haci un



tremendo trabao di animacion.

E sala cu e bolo preto a keda artisticamente dorna loke

tambe a causa admiracion den e invitadonan.

Belen a keda hopi contento y satisfecho di mira con por a

uni hunto pa demostra amor y aprecio pa nos cultura lanzando asina su di dos coleccion di poesia.